

30. " Obtutus, longe descendens, cum labore quasi haurit istas *Pampæ*
" lacus aquas, inter propinquas calami sylvas latentes, in quibus grues
" ludentes conspiciuntur.

31. " Ibi ego, procul a te amata commorans, cum voluptate conspiciebam
" *rathágarum* paria, nunquam sejuncta, sibi invicem lotorum folia por-
" rigentia.

32. " Atque cum amplecti cuperem tenuem istum *asokæ*, in litore stantis,
" ramum, duobus florum fasciculis, mammarum instar pulchris, inclina-
" tum, ad te me pervenisse putans, *LAKSHMANAS*, lacrymas fundens, me
" retinebat.

33. " Isti gruum in *Godávari* fluvio ordines, tintinnabulorum aureorum,
" in curru pendentium, sono audito sursum evolantes, tibi obviam quasi
" veniunt.

34. " Ista *Panchavatis*, ubi tu, quamquam tenero corpore prædita, no-
" vellas Mangiferas gutturnio rigare solebas, cum cervis suis sursum
" spectantibus, post longum tempus denuo conspecta, animum meum
" delectat.

35. " Ibi prope *Godávarim* fluvium, me, a venatu redeuntem, lassitudine
" undarum vento levata, capite in occulto in gremio tuo reposito, in calami
" sylvis dormire memini.

36. " Qui sola oculi nictatione *NAGHUSHAM* ex *INDRÆ* loco decidere fecit,
" ejusdem vatis, aquam turbidam limpidam reddentis, ista habitatio erat
" terrestris.

37. " Voluptatem percipit animus meus, cupiditatis expers, dum odoratur
" trium ignium, quos vates ille, irreprehensa gloria præditus, colebat,
" fumum, qui, in currus viam adveniens, butyri sacri odorem spargit.

38. " Iste *SÁTAKARNIS* vatis lacus voluptarius, *Panchápsaras* appellatus,
" cum sylvis vicinis e longinquo resplendet, O superba, veluti lunæ orbis,
" paullulum inter nubes conspiciendus.

39. " Olim ille vates, una cum cervis non nisi graminum culmis vivens,
" ab *INDRA*, meditationem illius metuente, inductus esse fertur in quinque
" *Apsarasium* juventutis laqueum.